



REPUBLIKA E KOSOVËS - REPUBLIKA KOSOVA - REPUBLIC OF KOSOVO
KËSHILLI GJYQËSOR I KOSOVËS - SUDSKI SAVET KOSOVA - KOSOVO JUDICIAL COUNCIL
PANELI ZGJEDHOR PËR ANKESA DHE PARASHTRESA
IZBORNI PANEL ZA ŽALBE I PREDSTAVKE - ELECTION COMPLAINTS AND APPEALS PANEL

Anr.37/2025

PANELI ZGJEDHOR PËR ANKESA DHE PARASHTRESA (PZAP), në panelin e përbërë nga gjyqtarët: Kujtim Pasuli kryesues, Hajriz Hoti dhe Bujar Muzaqi anëtarë, duke vendosur përkitazi me ankesën e subjektit politik Lëvizja Vetëvendosje (LVV), me seli në Prishtinë, paraqitur kundër subjektit politik Partia Demokratike e Kosovës (PDK), me seli në Prishtinë, për shkak të përdorimit të gjuhës së urrejtjes, gjatë fushatës zgjedhore, për Zgjedhjet e Përgjithshme për Kuvendin e Republikës së Kosovës që do të mbahen më datë 09.02.2025, në seancën e panelit të mbajtur më datë 17.01.2025, mori këtë:

V E N D I M

- I. Pranohet e bazuar ankesa e subjektit politik Lëvizja Vetëvendosje (LVV), me seli në Prishtinë, Anr.37/2025 e datës 15.01.2025
- II. Subjektit politik Partia Demokratike e Kosovës (PDK), me seli në Prishtinë, për shkak të shkeljes së Kodit të Mirësjelljes për Subjektet Politike, Mbështetësit e tyre dhe Kandidatët, i shqiptohet dënimi më gjorbë në lartësi prej 2,000.00(dymijë) euro,
- III. Detyrohet Subjekti Politik Partia Demokratike e Kosovës (PDK), me seli në Prishtinë, që gjorbën e shqiptuar si në pikën -II-, të dispozitivit të këtij vendimi, ta paguaj në afat prej 15 ditëve, nga dita e plotfuqishmërisë së këtij vendimi.

A r s y e t i m

Me datë 15.01.2025, PZAP-i, ka pranuar një ankesë nga subjekti politik Lëvizja Vetëvendosje, (LVV), me të cilën pretendon se më 14 Janar 2025, në një postim në rrjetin social në facebook në të cilin është i përfshirë poashtu Sekretari Organizativ i Partisë Demokratike në Malishevë Ruzhdi Kryeziu, është publikuar një veprim i këtij të fundit bashkë me një qytetar tjetër, kinse aderim i ri në PDK, i cili veprim nxitë urrejtje dhe bie në kundërshtim me dispozitat ligjore të Ligjit Nr.08/L-228 për Zgjedhjet e Përgjithshme në Kosovë, konkretisht, nenin 34. paragrafi 1.11. Në postimin e tillë në rrjetin social po në njëjtën datë, të dy akterët kanë vepruar asisoji në mënyrë që kanë nxitur urrejtje e cila bie në kundërshtim me dispozitat e tilla ligjore të Ligjit Nr.08/L-228 për Zgjedhjet e Përgjithshme

në Kosovë. Parashtruesi i ankesës si provë ka bashkangjitur ankese linkun për postimin në rrjetin social në facebook.

Më datë 15.01.2025, PZAP-i, e njoftoi subjektin politik Partia Demokratike e Kosovës (PDK) për ankesën e paraqitur kundër tyre, duke i dërguar kërkesë për përgjigje deri me 16.01.2025 në ora 12:00.

Në përgjigje në ankesë të paraqitur me datë 16.01.2025, subjekti politik Partia Demokratike e Kosovës (PDK) ka kundërshtuar pretendimin e subjektit politik Lëvizja Vetëvendosje me arsyetimin se pretendimet ankimore të subjektit politik Lëvizja Vetëvendosje kundrejt subjektit politik Partia Demokratike e Kosovës për shkelje të nenit 34 par.1.11 të Ligjit për Zgjedhjet e Përgjithshme të Kosovës në të cilin shprehimisht përcaktohet: *“Përdorimi i gjuhës së urrejtjes, në formën e shkruar ose gojore, që nxit ose provokon, ose që mund të nxisë ose provokojë, një person tjetër për të kryer një akt të dhunës kundër personave tjera ose pasurisë, ose e cila nxit apo mund të nxisë urrejtje kundrejt të tjerëve, ose duke publikuar ose përdorur fotografi, simbole ose çfarëdo lloj materiali tjetër që ka ose mund të ketë ndikim të tillë “janë të pabazuara.*

Me tutje në përgjigjen në ankesë subjekti politik Partia Demokratike e Kosovës thekson se pretendimet për shkelje të dispozitës ligjore të lartcekur, më veprimet e Partisë Demokratike të Kosovës, nuk mund të konsumohen në asnjë nga elementet e kësaj dispozite ligjore sepse veprimet e këtij subjekti politik kanë qenë në harmoni me dispozitat ligjore, nuk është përdorur gjuhë e urrejtjes, nuk ka pasur provokim, nxitje për akte të dhunës apo formave tjera të ndaluara me Ligjin për Zgjedhje, dhe se veprimet e subjektit politik Partia Demokratike e Kosovës, kanë qenë në harmoni me nenin 3 par.1 të Ligjit për Zgjedhje.

Subjekti politik Partia Demokratike e Kosovës po ashtu ka theksuar se meqenëse asnjë veprim i subjektit politik Partia Demokratike e Kosovës nuk bie ndesh me nenin 34 të LPZ-së, kërkojmë nga PZAP që ankesën e palës ankuese subjektit politik Lëvizja Vetëvendosje ta refuzojë në tërësi si të pabazuar.

Paneli, pasi që shqyrtoj të gjitha shkresat e lëndës gjeti se:

Ankesa është e bazuar

Paneli, pas shikimit të postimit të ofruar si provë materiale e cili është publikuar në rrjetin social facebook shihet qartë se Sekretari Organizativ i Partisë Demokratike në Malishevë Ruzhdi Kryeziu, me qëllim të etiketimit të subjektit politik Lëvizja Vetëvendosje dhe promovimit të subjektit politik Partia Demokratike e Kosovës PDK, ka nxitur urrejtjen ndaj subjektit politik LVV, në atë mënyrë që përmes disa veprimeve të shfaqura në një video në rrjetin social në facebook ku i njëjti bashkë me një qytetar tjetër i cili gjatë aderimit të tij në subjektin politik Partia Demokratike e Kosovës, shihet në video duke prere me gërshtë kartelën e subjektit politik Lëvizja Vetëvendosje dhe i njëjti deklaroi *“nga sot kthehem te shtëpia e vjetër, aty ku i kemi rrënjët tona të para dhe nga sot e shkatërrojmë kartelën e popullistave (që i referohet kartelës së subjektit politik Lëvizja Vetëvendosje)”* me cilin veprim ka përdorur gjuhën e urrejtjes, e cila gjuhë e përdorur është konstatuar edhe përmes videos të publikuar në rrjetin social facebook.

Paneli, konform nenit 13 par. 6 të Rregullave dhe Procedurave të PZAP-it, Nr. 01/2014, me datë 15.01.2025, ndërmori hetim lidhur me pretendimet e paraqitësit të ankesës dhe gjeti se të njëjtat janë të bazuara, sepse postimi ekziston në rrjetin social.

Përdorimi i një gjuhe të tillë është në kundërshtim me nenit 34 paragrafi 1 pika 1.11), të LZP-së, me të cilën përcaktohet: *“Gjatë periudhës së fushatës, subjekti politik, mbështetësit ose kandidatët e tij, ndalohen nga bërja e ndonjëres si në vijim: ... l) përdorimi i gjuhës, në formën e shkruar ose gojore, që nxit ose provokon, ose që mund të nxisë ose provokojë, një person tjetër për të kryer një akt të dhunës kundër personave tjerë ose pasurisë, ose e cila nxit apo mund të nxisë urrejtje kundrejt të tjerëve ose duke publikuar ose përdorur fotografi, simbole ose çfarëdo materiali tjetër që ka ose mund të ketë ndikim të tillë”*.

Neni 120 paragrafi 1 nën paragrafi 1.3 të LZP-së thekson se në rast se PZAP përcakton se ka ndodhur shkelje e të këtij ligji ose e rregullave të KQZ-së, mundet të vendosë një gjobë ndaj një subjekti politik, në vlerë deri në pesëdhjetëmijë (50,000.00) Euro.

Përveç kësaj një veprim i tillë sanksionohet edhe me nenin 24 paragrafi 9 nën paragrafi 9.1 Rregullës Nr.01/2024, ku përcaktohet se "subjekti politik që është përfitues i fondeve per financimin e subjekteve politike përmes Buxhetit të Republikës së Kosovës dënohet me gjobë deri në pesë dhjetëmijë (50, 000.00)euro.

Ky përfundim ka të bëjë me faktin se Kodi i Mirësjelljes i detyron të gjitha subjektet politike, kandidatët, anëtarët e subjekteve dhe mbështetësit e tyre që ta respektojnë këtë kod me qëllim të krijimit të kushteve që gjatë periudhës së fushatës, veprimet e subjekteve politik të jenë në një atmosferë të tolerancës demokracisë, paqes dhe respektit për sundimin e ligjit.

Paneli, me rastin e vendosjes se gjobës si në dispozitiv të këtij vendimi, ka marrë parasysh të gjitha rrethanat si në vijim: natyrën e shkeljes dhe ndikimit të mundshëm të saj në procesin zgjedhor në fjalë, shkallën dhe peshën e shkeljes, se veprimi që përben përsëritje të shkeljes për nga natyra është i njëjtë apo ngjashëm, subjektit politik që ka bërë shkelje të legjisllacionit zgjedhor, apo ka bërë shkelje të legjisllacionit edhe në proceset e mëparshme zgjedhore, që konsiston në faktin se subjekti politik PDK, ka qenë i njoftuar me obligimet dhe përgjegjësit gjatë procesit të fushatës, shkeljet e Ligjeve zgjedhore në fuqi që ka bërë subjekti në fjalë në këto zgjedhje dhe në zgjedhjet e mëparshme në Kosovë që do të thotë se i njëjti është i njoftuar me rregullat zgjedhore.

Paneli me rastin e shqiptimit të gjobës ka pasur parasysh edhe praktikën e mëhershme për rastet për afërsisht të ngjashme.

Përveç të cekurave më lartë Paneli, me rastin e vendosjes i vlerësoi edhe të gjitha pretendimet e subjektit politik Partia Demokratike e Kosovës, në kuadër të pretendimeve të theksuara në përgjigje në ankesë, mirëpo të njëjtët ishin të pabazuara, të pa qëndrueshme dhe pa bazë ligjore si në dispozitat e Ligjit për Zgjedhje, dhe si të tilla nuk ishin me ndikim për një vendim ndryshe, për çka Paneli, vlerësoi dhe vendosi si në dispozitiv të këtij vendimi.

Nga arsyet e theksuara me lart, e në kuptim të nenit 34 paragrafi 1 nënparagrafi 1.11, nenit 118 paragrafi 1, neni 120 paragraf 1 nënparagrafi 1.3, të LZP-së, nenit 10 paragrafi 1, nënparagrafi 1.2 të Rregullores Nr.01/2024 për Procedurat e Parashtrimit dhe Vendosjes së Ankesave vendosi si në dispozitiv të këtij vendimi.

Paneli Zgjedhor për Ankesa dhe Parashtrësa
Anr. 37/2025 më datë 17.01.2025

Kryesues i Panelit
Kuftim Pasuli



Këshilla Juridike: Kundër këtij vendimi është e lejuar ankesa sipas nenit 118 paragrafi 4 të LZP-së, në Gjykatën Supreme të Kosovës, brenda dyzet e tetë (48) orëve nga momenti i marrjes-pranimimit të këtij vendimi.